

摘藻堂四庫全書薈要

集部

欽定四庫全書薈要卷一萬六千二百二十二

集部

秋澗集卷六十六

元 王惲 撰

箴

憲司箴

肅肅憲司虞夏九牧其在漢唐刺史都督控臨百城靡
不約束既重其權匪輕所責治弘務簡望隆威赫有臺
閣清嚴無州郡急迫繡衣四出輜軒金節命服有彰非
爾徒設奉宣詔條巡省按決官之邪正政之得失酌汝

之言以明黜陟俗之媿惡民之休感恃汝注措以安以
息國有重典越惟刑辟圜土幽囚肺石寃抑仰汝審察
哀矜致恤毫髮或差追悔何及剛不可憚憚則氣拂弱
不可欺欺則衆忽事無避難避之愈集法毋情破破之
有窒何以處之必正必式一有私萌力為之克如松斯
貞如鷲斯擊其嚴秋霜其平砥石是乃所云邦之司直
我玉無瑕彼疵可錄志行氣伸吏畏民服一道清寧乃
稱所屬其或暗夫大體苛細是燭較利害之孰多至首

尾之畏跼甘於慵身計日而祿官謗闕迨顏厚有忸爰
作斯箴敢告司僕

言箴

語戒過繁論先期用我之樞機寧唯妄動急躁輕易違
理取勝過慮思邪皆言之病一不知檢有害於性審察
安詳時然後應非法不言一出於正其或不然自蹈於
寗念之念之

忍箴

忍之為字以刃加心少或弗隱其傷必深家府維訓挺
挺而全謂予平生半在官聯萬變前陳履薄臨淵少觸
與競其心即燃自救弗暇理何有焉量汝之性以忍為
先惟忍則濟欽哉聖言

銘

楷杖銘

并引

孔林之木瓌異者為多魯人世不知其名者蓋夫子
沒弟子各持其方之木來樹焉在枌檀兔柞中名殊

顯者獨文楷耳前朝斲之板持以備新進之儀豈思
其人重其文敬其手植之意也歟紫陽公攜二杖過
衛一以贈予因識其楷之所以為楷也如是吁昔而
簡今而杖用雖不同至於重其文敬其手植之意一
也銘曰

體堅而微色正則瑩庚庚其文挺挺其性木根傳萬世
之芳枝葉蔭百王之聖斲而杖之以扶吾道之衰兮庶
由乎義路之正且予年之方盛是不可施於其鄉兮復

將弊蛇妖於異日于以叩原壤之脛惟柔與梓必恭且
敬矧吾家之草木敢不同甘棠而加愛兮故賡之以舞
雩之詠

擯榔杖銘

體堅而柔節促而澤赤藤桃竹非所狎兮青蛇奮螫腹
紋鱗鱗入手滑兮質挺炎德出入有聲豈特鏗爪甲兮
堂堂許公國喉舌兮杖而登朝表節兮是將代太尉之
笏擊奸慝於未孽也

芝枕銘

并引

予觀神農氏之經芝之種有五焉紅者如珊瑚青者如翠羽黃者如紫金白者如截肪黑者如澤漆皆光明洞徹如冰之堅五岳之所產焉後之以芝名者率若是豈柳柳州所謂天澤餘潤雖枯枿敗腐猶能幻出芝菌以為瑞物是謂之芝或間產名山或蒸出枯枿予不得而知也但不斤不斷底平面傾犀文外繞疊成枕形誠可以薦牀第而承幽人之憇息也銘曰

體似重而輕性似柔而剛豈顛木之餘枿薦幽人之野
牀質似芝而秀文似犀而光果齋房之瑞氣化奇形而
不忘但髣髴兮一枕之妙至於為芝為菌吾不知其物
化之常秀比蓮葉清凝寢香枕或強名用適則良俾歆
之藉之勿邪其所思兮是可以夢周公而接羲皇也

砥柱銘

水之為力無物不從津門之險壯夫砥之為雄洪濤西
來萬夫前攻而戰而薄我當其衝狂瀾勢倒安流而東

屹嵩華之隆崇也吾儕小人弱植淺中哀俗外誘羣邪
內訌苟內省而不疚有礙心而直吾躬也

金銀沙二泉銘

山之清潤澤氣以通兮坤之靈秀醴泉以發兮太行蟠
亘元陽所輒兮天門左界二泉並出兮巨鰲背鑿寶藏
泄兮靈淵濔濔海眼徹兮泓澄一碧金瓊屑兮全流石
爍爽冰雪兮雲煙藉潤為改色兮酌而淪茗甘冽兮
挹之薦帝明水潔兮淋漓膏液補天缺兮女媧鍊石用

不竭兮夸娥弛擔濯困喟兮七賢尋盟沈醉達兮幽響
傳谷鏘瓊玦兮山空月落仙人揭兮闕
生肥悟真訣
兮我銘勒石泉不涸兮

端石硯銘

硯之同功甲與鋌試之敵場惟利堅其或不爾安用焉
嗚呼此硯穹而圓神龜足跬舌有泉既利我穎墨且便
青州絳州何所賢題品入格因公權處士或托斯銘傳

默齋銘

語寂滅者涉於絕類談自然者入於虛無嗚呼默乎其
天地閉賢人隱括囊无咎无譽者與至於明良相遇治
具畢張一言而可以興除者如宣父夾谷之盟孔明隆
中之論茲吾儒之事也豈得退藏於默乎豈得退藏於
默乎

閑邪齋銘

噫嘻是心既安而放內閑外膠靡不馳嚮忘返從流于
馬板蕩維禮與義以戒以懼存之以誠為閑之具有人

于斯言動聽視庸信庸謹造次於是成德雖中慮萌邪
侈一念或非為奸所餌易演文言閑之義宣一聖精心
權輿於乾譬海乘載一碇能安如馬泛駕受羈則旋險
去而夷浪平斯淵彼碇與勒曷能舍旃何似李侯周防
未然操心知要惕焉拳拳言信行謹其殆庶幾一誠存
中太山可移素志不昧聖賢同歸

洮石硯銘

吁爾洮水中吐翠欲流礪於砥考之譜端歛齒波及余

古月子斲而泓堅澤玼孰為尸王御史

瑤瑁龜洗銘

暨月槃漢洗器制爾形從相類漢維魚我龜賁取彼壽
縮元氣宜子孫傳後裔銘者誰王子系

訥齋銘

堪輿兩間事變靡極成始要終非言莫立玄聖垂教訥
言為先匪曰終默時然後言喋喋利口返為事愆覆邦
亂家身溺于淵猗嗟邵君內思靖顓一訥銘齋浩浩其

天人亡道存寔大其傳尚來者而恪守猶丹書與湯盤也

文貞公笏銘呈竇學士公家物

唐有天下垂三百年於粲者貞觀之治焉其効蓋仁義之一言世之望公三辰在天是則公之德何俟笏而賢耶銘存物亡寔大其傳則是樵之文伊笏之曾玄也猗歟竇公國老之元神物有歸竇之几延安知無望壠而求後因甘棠而思邵伯於燕者耶

仙臺金跡硯銘為宋少卿弘道作

盤盤嘯臺一碧千尺湛月露以洗空隱松風之滿瑟仙
游何之留此真跡斲而硯之是將晦靈蹤於翕歛藉玄
雲而掩抑神物有歸蘭臺之客會登玉清蕩空碧斗挹
滄溟醉憑鰲格拂海苔之霞牋揮仙火之巨筆也

楮都護銘

漢開西域國三十六中置都護控制約束強凌弱折廼
有攸屬我嗜羣經視為席珍繙閱不時未免絲紛亦作

護府仰茲楮君統之有要無相奪倫侵損日遠緝熙日
新挿架安書曰史曰墳勒銘于上策燕然勛

太湖峯銘

丁生贈余湖峯一株頂足背面蒼鱗隱隱渾然天成
無微竇可隙植立几案間殆與頎頎君子相對殊可
翫也昔元春陵作榱溪榼樽等銘命名既異垂戒又
深予嘗讀而愛之因銘茲石仍掇其義

片石何狀天然自若鱗鱗蒼窩背露蛟鰐一氣渾淪略

無巖壑太湖凝精示我以樸我思古人真風眇邈變詐
百出孰知誠確心深洞府混沌六鑿剛健篤寔君子之
質惟其似之是用比德嗚呼安得誠天下之意如茲石
之挺特也

書厨銘

至元十七年八月三日夜與子孺燈下觀丹書銘因
擬而作此

置之於室胡若載之腹也名汝曰厨以其無不蓄也腹

至於餒返為汝所忸也子其戒之惟勗

鸚鵡啄金桃研銘

大名劉總尹求子作忍濟堂銘奉此研見謝

翠鸚啄桃翩欲飛去棲影片泚以慧之故芸閣風簾疑
若與晤助彩毫端辯夫詞語植黃鶴而倒芳洲賡正平
之賦邪復明辟而以夢諫草梁公之疏也

菊井銘

余到官兩月移居司西官舍治舊井而新之方衆菊
爛然擇其佳者植諸欄傍因銘之曰菊井其辭曰

養而不窮者井之德也服而能壽者菊之靈也我潔斯井罔羸其茀彼窈然而泓泓然而澄蓋南山之餘溢廼濟清而未名思欲沉浸醲郁皆菊之馨庶幾西河南陽之意仁吾民而制頽齡也

冬藏圖右銘

太極中分有靜有動氣與理錯未免交閔孰盡聖哲不思而中思而或邪奚翅荒縱理明伊何精一為重閑邪存誠發而可衷內莊全體外致吾用早也奚思尹則孰

覺一洗妄心盡易前錯學孔之學樂顏之樂華去實存
玉礬石斲道最中害或輟或作不學而衰即成枯落念
至于茲立敢不卓靳惜分陰守之以恪敬入為門補我
不足足豈三餘日新一日動靜云為是為之則敢告靈
臺服之無斁

左箴其目曰定力以固窮為冬藏圖作

天運循環有泰有否人生其間廼一氣類之財曰困弗
通為塞苟遇不安習坎而阨自昔君子器藏俟時出門

有礙吾將安之仲由愠見阮籍窮哭惟昧困理于躬于
危安之有道說不徒泛堅我定力不容少濫氣養以剛
志明由澹少焉墮昏亟為澄湛衣敝服緼一溫而止飯
糗茹蔬一飽而已茫茫厄臺悠悠羨里文明為異孔玉
櫝毀聖賢猶然况弗至此我道未亨克念終始

敬義齋銘

維天生民畀之者全氣有澄淳因之以偏惟聖立極俾
復其天因而弗學民斯為下甘彼顓蒙時有不暇間有

知悔或窺厥竅遺緒茫茫又昧其要大哉文言聖學之
宗致力兼補蒙而聖功一敬内生義須外克凡百君子
有云有為行而宜之心宰物隨祇直而莊匪方於動事
物之來未免變闕惟其夾持務成德尊既銘吾心復書
我紳始終是則日新又新

垂龍圖銘

所翁姓陳氏福州人嗜飲恬於仕宦善圖龍見知於
宋理宗嘗以商舶越海與真龍遇自是盡其情狀其

作也必乘醉潑墨為之天機所到非學而能殆邈棚
之巽墨法云

醉墨翻雲族聚所翁圖龍與真遇黑風吹海作太陰
大火出山雷奮豫是將執雨機而飛天俾滂沱而洗
吳楚

宿雲軒銘

并序

吾友中丞王君買宅蘇門得奇石一峯厥狀如雲靄
然輝映於庭戶間甚可愛也因名其軒曰宿雲徵文

於余乃以是文表之其辭曰

瞻此峯雲態度容與觸石而生與石為伍宛彼南山宿
我庭宇主人名軒其義安取是將停藹藹之容為思友
之故邪伴東山之卧抱濟時之雨也雲兮雲兮出兩者
之間固無心兮其從龍也須以時兮吾豈欲度之以自
潔徒為怡悅而已邪

水晶筆格銘

玉瑩冰清太陽之精孰琢肖山之形鎮我几案虛白夜

生息我矛稍摩壘之聲空明洞徹爛氷峰之孤撐物有
形似吁足可驚若倚之而固寵旭日已升恐潰釋而摧
崩也

頤軒銘

為洪同
簽作

堪輿兩間物所克兮而長而養一氣融兮人惟法天浩
焉同兮願以象觀四陰內訏惟養之以中正不我舍而
彼從是以得終吉而在躬洪公孕秀海山沉雄其材足
以經制其量足以含弘贊翊樞務既貞且忠故謀謨應

事機之會談笑折尊俎之衝不恃全美方致養以為功
果我枵腹以正以冲虎眈其視而始而終見寒思煦恐
邊衣之未脩寸膚失養念一士之或瘡扁吾軒而匪外
飾起居飲食在日用常行之中吾將養已以及物致事
業於無窮是知大易迺萬世之龜鑑尚何俟授一編於
圯上之翁也

愛菊堂銘

草木之品色中氣清有隱逸之稱唯菊為能含精益齡

晚而芳馨又類夫君子退讓而不爭圮橋老仙友而堂名雖墮履之弗進亦足以卜幽人之永貞華構傳芳三世相仍其孺慕也孝凝然心深而愛中樂不勝口欲言而不能自鳴者此郭氏之所以尋盟也若夫平泉草木固護封植亦克厥承是或一道終未極愛之之至情親存親沒觀志視行曰如其道終身是程嗚呼郭君至性愉色豈得於尹氏者拳拳而服膺吾今取為銘以告草堂之靈安知不入戶聞愾然之聲也邪

虹霓硯銘

并序

趙太博彥伯出示紫石大方硯請銘余以石有奇雲
類虹霓然因以字之銘曰

蒼梧雲蒸九疑濕碧海風濤翻出日江山通秀鬱紫煙
產此珍材比玉德金繩繞腹泄精英電激神光掣蛟室
雌霓斷影飲丹池暮雨連蜺一千尺號泥鄴瓦稱善墨
石中乃有此奇質子墨客卿尤所惜大率縱橫供夢
筆左招協律揖孫通出入英莖五音飭

楊氏雕玉寶章銘

并序

故叅政楊公之子勗家藏漢雕玉印章二方者丞相吉
圓者太尉震也其博陽章即乃祖息軒所傳故物大定
十二年崔憲可詩序云長安許惟寧以是博秘自米家
船入手摩挲三嘆息趙君文彩珊瑚鉤禮樂監畫于闐
花驄圖得之嗚呼二公以通明正直師表兩漢今去千
餘載其風烈凜然思其人而不得覩物增慨乃為作銘
士桓博雅好古今為集賢直學士庶幾能紹其家風者

漢丞相博陽侯丙吉印銘

吁寶章纔寸許紐靈龜綰漢組隸為刻見邈祖神物護
照千古此何夕得摩汝恍坐我丞相府初望氣郡邸圖
詔夜殲拒戶樞是雖天公可無偃柳興將舊圖乳祿恩
其可辜獄有牘秘不舒是章緘金滕如歸有數子與俱
十襲藏無太踰防有光夜衝閭六丁取婉貞符在博陽
宜特書

漢太尉司徒楊震印銘

伊弘農漢巨儒道高仕聖為徒主鱸堂閱羣書表氏諱
茲為符位台鼎綰國樞赫漢炎走羣羆堂堂氣忠義軀
四知金屬貪夫殆是章玉不渝內寵橫哲人殂與雀環
瘞幽墟見白日歸子裕世失系紛莫區伊草楊豈公莘
苟不爾胡為乎致大鳥止丘隅淚如雨洗冤誣佩之行
可舍諸我作銘此嘻噓

張指揮甘白堂銘

我識先師于清之野緩帶輕裘投壺歌雅伊時張君侍

立親傍虎豹在穴已炳其章及將羽林肯構其堂榜以
甘白于先有光試嘗論其言論諒天姿之殊常是將調
和衆味羹傳鼎之美邪彰施五彩絺上公之裳邪噫吾說
已竟必一居於此恐德業之未易量也

忍濟齋銘

改作爲楊
子英題

多變而莫測者事機淺深殊跡而難度者人心善惡我
據事會忤激交作彼以機成客氣外鑠或當懲而乃忿
可理遣而返愕隘不自容事安能若因小端而致大亂

又奚翅九州之鐵而鑄一錯也理貴含弘量崇濩落功
若與即是心先忤言不可出我舌為辭故堅伺桓門者
收康濟之功俛出勝下者辨戡定之畧宜成王之戒君
陳見周書之噩噩

海印奎星研銘

宋秘監弘道索賦詩被東宮旨編節世宗寔錄

奎麗空文之宗秀孕石與歆逢礪而研以類從海有瀾
穹浮蓋印文光終古在拱前星間有待憲玄雲集毫彩

酌前言作帝誠

歙石壁研銘 并序

至元癸未歲正月二日謁左山先生坐間出茲硯示
客僕以形質異常略狀數語公喜甚曰汝言殊有契
予心者吾子其為我銘之銘曰

玉德而金聲穀紋而紺理湛兮虛見明生於旁魄恍兮
惚疑壁投於山鬼玄雲橫馭風生燕几顯諸用起經綸
於心上發餘輝綰秋蛇於筆底是則公事業之美也我

將靜濯碧空洞徹表裏觀春雨之散絲似商霖之復起也

醉仙石銘

為韓通甫作

爬髻墓緣蹒跚驚跛化而醉仙蓬首不裹傾歌落魄對客程裸惟不適用得脫秦火黯桂樹之秋香普故宮之青鎖推墮人間無可不可頑碧凝蒼肩袖垂譚留賓筵而盡餘歡每蹲蹲而舞我也

殷乳鼎銘并序

韓生弘以瓦鼎示予制極古而可愛余曰此從何而得曰得之於帝辛之故墟然不知其為何制也余曰此殷之乳鼎也即為之銘曰

惟殷墟廢已久代所居止野叟歿而葬此何有其為物故商埴千年後見白日乳至四宜蟄蟄萬有生皆此出取為形穀琢璧媿龍觚飲而食秋澗銘渾沌鑿韓生藏深夜壑後來者見必作

贊

老人星贊

月帔雲衣金支翠旂御星駟而凌沆瀣騰淵耀而表明
時爛祥光於萬大湛南海之清輝我見我出為瑞為禧
歷朱方而朝北極祝皇壽之無期何南山之鞏固等旻
天而峻齊然後廓壽域兮無際挈斯民而溥躋倚益霏
霏蒼茫曷歸貝闕珠宮羣仙與嬉歌東皇而遠引隨升
降而入氣機但天容海色渺不可以涯涘兮眩朝日之
重暉

先君思淵子畫像贊

德之厚其所受也全學之博其所守也專材刃恢恢利
周物先占氣斗間比之龍泉卒之臨大事以益辦曾何
以惠文而為賢望之儼然即之溫然治之隆污持衡以
權一言吏師世有可痊孰謂神而化之之妙托丹青而
可傳耶

王內翰寫真贊

摠管蕭君出示承旨內翰寫真本菴師題贊其上佀

有所未盡者因為之贊云

充氣之粹兮與材無忤靈襟之廓兮以道為腴延舉在
龍門之上視草冠玉堂之廬其及物則見百里之寄其
托輔則可六尺之孤天步改玉婆娑兩都悵蒼蒼之
秋色鬱喬松而未枯尚能賓扶桑之出日振人文於燼
餘見之丹青清風穆如人徒知百年之遺老我以謂中
朝之鉅儒彼睟然而容盎然而春見於眉睫之間者固
非山澤之臞也耶

鮮于純叔寫真贊

遙遙華胄世霑令聞沆水之集其源濬淪老成雖遠而
典型今見于斯人髯踈而秀心吉而仁藤白而冠紗烏
其中豈見夫身外之身予但知仁者之必壽其風姿落
落百歲猶畫中之真也

麟匹贊

喻羸匹脹豕腹背負厥角挺奇骨列太階職盟滌今歸
于我研與匹薊門市南冬日得滄溟之波浩無極挹彼

注茲泚我筆茲拚誅絕旌直德子孫寶傳金玉式

桑泉老人畫像

德與學專行為世傳是之謂有年雙瞳炯然蒼髯戟然
人自曰山澤之仙庸詎知抱長孺之直甘骯髒於門邊
者耶

范文正公畫像贊

堂堂范公三代之佐致君澤民盡夫在我曰義與仁經
綸之具篤信力行曾不易慮受知裕陵千載一遇其施

幾何貞我百度狺狺羣言激公而去天下之事匪材莫
為遭時富材中靳固之治止斯耶由數竒耶再拜公像
涕洟咨嗟

乖崖公真贊

堂堂益州元精之傑用智馭權以氣達節在德克剛得
吏之訣其掾時也若乖崖而極經綸其擿姦也不鉤距
而洞窟穴噫太華之雲清淮之月豈無閑心大厦火爇
較以出處此兼善而彼獨索宜公平生日新事業皁棗

褐衣有將之威我拜公像清風凜而悠悠九原愛莫起之

呂仙翁真贊合道陵祕府物今為王簽省家藏
元精貫中老不息先生煉形與之一氣機出入我所乘
世間甲子管不得有時變現稱劍客三江五湖風袖碧
江雲紅爛岳陽樓醉飛星馭鞭金蚪騎驢歛上長安道
來看西風渭水秋古人事業垂不朽八表神游欲誰友
乾坤况復一洪爐萬古消沉竟何有先生遺照滿人間

已是真筌不死傳只須袖裏青蛇氣夜夜人驚在斗邊

駁華驄圖贊

并序

馬之有駁猶人表之異常也昔骨利幹貢馬百匹中有駁者太宗愛之親為製名曰決波驄又秦胡公有乘馬號忽雷駁此馬毛質時異豈骨利之遺種歟故供奉官圖形以獻見方物一時之盛云

吁神駒骨相殊振蒼雲散華軀供帝閑馭虬鬚歷八極塊清都非所覲三品芻有物制噤不舒絡青絲伍髯奴

終奮鬣躍天衢君無癡茲畫圖

填星神像贊

坤元之精積而上曜厚載之德至靜而妙爛然黃明有
歲之兆僧繇像之其神杳杳冠著牛首類其順也手綰
方袂取乎填也非夫知鬼神之情狀者何以測其奧隱
也

二十四大儒贊

并序

堯舜之道得孔子而後明六經之旨俟諸子而後發

逮秦火燔蕩先王之迹一向熄滅而天理之在人心者何嘗有一息之間斷哉漢興諸儒挺出如董生劉向孔安國毛萇揚雄號稱鴻碩斯皆摘奎之光發輝孔壁探聖之幾取訂口傳致興學立官文風彬彬可謂盛矣然六經之旨有師授而無傳著東漢已來師說並行馬鄭賈何服虔王肅之流網羅衆說正誤刊繁流藻箋註復使聖道燦然如大明當空蔑不耿昭以之斷國論建民極有不可斯須離者至唐踵七代

之哀理雜文弊道統益微及韓愈氏出以道濟自任
隄障末流廊清義路蓋皇皇如也故人偶位置終之
以昌黎伯者良以此歟若夫

闕

三才彌綸元化

前世比

闕

圖像列配神庭

闕

為不刊之

闕

至元癸未冬十月齊府廟宮兩廡繪事告成

闕

明靈儼然如在爰作贊文昭揭於上庶幾乾端坤
闕軒豁呈露聳齊人之敬為邦家之光也

左丘明

麟經垂憲百王是懲素臣筆傳日星益明文開史統世
咀華英儷景同翻永播休聲

穀梁赤

封襲
丘伯

聖道羣用見有深淺赤也明經辭清義婉漢儒推轂大
開學館繼我國政論益光顯

公羊高

封臨
淄伯

麟出魯郊筆終史削公一再傳若聆狗鐸宜其資深裁
辯辭諤折衷羣疑匪斯孰托

荀卿

封蘭陵伯

金聲絕響詭辯縱橫蘭陵著書吐辭為經憤彼謫變欺
世迷民性惡之說有激而云

伏勝

封乘氏伯

秦火驪坑儒厄斯極天不沒公俾副孔壁渾灝之義垂
範後王賴公口授帝道復光照耀齊國文奎煌煌

毛萇

封樂壽伯

風雅三百一歸無邪絃歌音眇孰為傳耶溫溫樂壽漢

初名家訓傳首出遂正而葩敦厚之風永煽幽遐

高堂生漢博士

封萊
燕伯

秦尚法制禮喪無幾雖雖堂生當炎之始闕

國

容有顏會弁澤宮赤舄凡几

孔安國

封曲
阜伯

書出漢初壁傳口授古隸未分詎免訛漏天開聖孫以
傳以定帝制復明翼我國政

戴勝

封楚
丘伯

曲臺傳經有千其儀戴君發揮其詳可知履之則貴悖
馬來違煌煌天序相我民彛

劉向

封彭城伯

彬彬中壘帝胄惟英授經草諫力扶漢傾已志伊鬱聖
學崇明驚冕玄端山立神庭

揚雄

封成都伯

有漢鴻儒述作之賢體易之妙衍夫太玄挾聖之心繼
成法言大醇小疵其然豈然惟寂惟冥天祿之閣出處

兩間其何以忤

何休

封任城伯

高也傳經心深而文秦漢而下莫闕其門任誠解詁堅
守如墨開戶免脫破碎陳敵駁我漢事會歸其極

鄭衆

封中牟伯

喧啾梁門師也威鳳志棲阿閣學明三統皇皇使華漢
鼎取重諒夫通材中藏大用

馬融

封扶風伯

扶風氣豪博精羣集賢如鄭賈執經在席暢我休風彬
彬文質尚想絃歌漢南之國

盧植

封良鄉伯

海山沉雄精貫斗極篤生大儒文武之特以道事君以
經翼國劒佩赫然氣掩羣慝

鄭玄

封高密伯

秦燔六經天理曾熄漢興諸儒臆說雜出司均網羅刊
繁正誤箋注皇皇流藻終古

服虔

封榮陽伯

卓越九江清介不羣雅材文論為世所珍任城巨敵左氏忠臣光邁漢彥蔚乎其間

賈逵

封岐陽伯

偉哉侍中好問而博通明四經大肆厥作網維國論張皇帝學東觀石渠光寵於爍

杜子春

封緱氏伯

周官大典興王之迹制古辭約我解我釋入海穿深薄

霄透碧品物詳明千載是式

范甯

封新野伯

藻發儒林學淹墳籍嫉世浮虛著論詣寔盤盤學臺膠
庠大開至今豫章有來羣材

杜預

晉大將軍開府儀同三司當陽侯贈司徒

堂堂征南經制晉室衽席金革研精麟筆學方武庫世
號經癖有開後來理順冰釋繫公存歿懍恍靈氣我曰
猶龍焉取虺異

王肅

魏衛大將軍太常
蘭陵侯贈司空

猗歟子雍英發妙年書易陽秋傳列學官制刊朝典秩
煥郊壇汪汪東海載觀其瀾

王弼

字輔嗣魏尚書
郎封偃師伯

龍出河圖經成三聖輔嗣窮幽乾旋坤靜漢說多門唯
公取正伊洛淵源流光與盛

韓愈

字退之唐吏部
侍郎封昌黎伯

維天有文公材命世彊義滂仁黜邪闢異世溺方深力

以道濟百折彌堅死而後已倒影滅沒藐不可企

文中子

顯允文中希聖之徒闡教河汾宛然泗濟斤斤隋文不足與事挾策歸來心醉經史曰魏曰房曰杜曰李學傳聖心有樂有禮貞觀至治有三代風論夫源委先生之功千古而下與唐比隆

鍾氏先世畫像贊

為鄉人
大明作

顯允鍾公肇跡自秦金季家衛以財發身闡樓卉圃照

映河濱優游卒歲壽開八旬維嗣強矯結髮從軍奮提
干將屢收戰勲釣臺雪潰死節酬恩伊恕之父蛇化其
文憤志讀書行比鄉鄰陳力漕府克公克勤是知善繼
述者豈無其因不過積德與崇仁故培之厚者其發茂
浚之深者其流湣嗚呼鍾氏之子孫能不封植其本根
也

趙曹州畫像贊

宓子宰單鳴琴在堂琅琅玉音齊魯之鄉流清芬於異

代得趙公之循良
義冠惠文貯書撐腸不竊榮而易素
守曾格物而恃已長貳政兩州治績章章字民折獄仁
恕內將體春陽而休煥孰如秋荼之繁張觀兩漢之卿
相自卒史而翱翔以材以術公其可方固沉底於下位
浩淵流兮未央維嗣善繼乘驄奮驤慶之所鍾于焉厚
償匪槐棘而就列將禮文之有光又何啻簪白筆而飛
簡華之霜也

九公子畫像贊

史開府子名禕喜莊列學屢為萬夫長有時麻衣草屨以散仙自號

銳目豐頤氣貌魁竒被褐懷寶有儼其儀出紈綺之間無豪貴之習抱夷惠之志蔚熊豹之姿齊物我於一致感盛衰之無時其或戴遠游之冠甘元氣之委騎將軍之馬掃干將之霓歛生臯比玄談四馳提筆揮洒以遨以嬉斂凌雲之劍氣等尺鷃而蓬飛耻以藝進與時推移希達人之大觀每先事於幾微與其身之外樂何若

心之內怡是則散之爲僊見於丹青者如是又何計騰
寓說而橫氣機也試將須而爲問恐吾言之庶幾

漢諫議大夫王章博士朱雲贊

并序

孝成之朝劒履間健者猶百位然挺身爲國直言忠
諫者誰歟蓋當時皇綱紐弛威福柄移赤伏陰凝堅
冰日至獨能痛國統之將微憤中外之單弱毅然與
天子合謀屬具臣矯朝曲以社稷大計爲言有殺身
以成其仁者在漢二百餘載之間唯仲卿與朱游二

人而已何忠直剛果之氣寥寥如是哉論者方以不
量輕重陷於刑戮為譏吾恐為人臣者不以容身保
祿是耻將何以為訓作諫議大夫王章博士朱雲贊
其辭曰

天厚之剛百折不撓履霜而冰辨之當早漢至元成國
統中熄陰掩陽精九廟不食劒履羣卿孰非遠識坐眡
淪胥權歸外戚厄會中來詎容人力公豈不知言出禍
入殺身成仁臣子之職彼牛衣言固非所恤諤諤南昌

感公奮激抗書申明路開忠直三復斯言寫我心感
維皇有師禮自天秩動靜安危以物以則矧惟中材性
可善惡俟我儀刑狂聖廼作安昌師漢腹心之疾竊我
崇高容奸隱慝社稷大計莫此為亟雲位下僚自任稷
契犯顏櫻鱗為漢藥石諫雖弗行彼氣則折攔檻嶙峋
我舌不結少師廟軀龍逢挺節以分以職於死為說並
游無慙終古有烈

嚴子陵贊

漢有天下本以霸興陵遲世季其弊莫勝光禹阿諛雄
歆狂鄙元成以來從風而靡維炎中熾故人作帝先生
慨傷為漢砥礪潔我一已訓彼四方顧惟可加萬世之
光幽幽富春渺渺桐江釣絲裘褐終焉徜徉是則柔理
之道先生助治者其維皇哉噫

漢議郎田疇贊

炎漢淪精羣雄蠡起士昧所擇依強而已附袁臣曹風
從雲委倖而有成終焉自免堂堂幽州志在安劉信我

大義掃清國仇先生委質名正言順報以國使力扶衰
運間關歸來大事已去君讎未復吾將孰與躬耕故山
有死無貳白狼之役諒非本志是懲是膺權以濟事何
以明公龍盧之封繫以千駟祿之萬鍾曾不少睨肯縻
其躬嗚呼智如荀彧識似田豐明不自保竟貽終凶千
古而下死魄英風

抵挽贊

并序

郡譙門兩振下有石獸左曰抵右曰挽為狀特異隱

其齒而吻張崩其角而顛兀頂髮雲委垂卷兩膊世傳殷宮中故物自衛縣移置於此放之集韻云秉心甚靈蓋忠直獸也彼物爾得氣之偏者也何以識其性之云然以屈軼指佞神羊觸邪麟趾厚而不踐虎螭仁而有威是以忠與直可得而推也其所以表之以為世儀者古人制物有所取而垂戒焉蓋忠者衛上之謂直者不骫之稱此則臣子之所固有而所當為者物能如是可以人而不如獸之云乎作抵牴贊

贊曰

吁奇尾三代制賢其德與獸異體具存神則逝逐比干
而下遊悲獨夫之狂狷抵兮跪兮無效麟之出非時兮
使吾拭面而反袂

西溪真贊

秩秩其德曄曄其英天稟之厚固非學之所能用晦而
明與時偕行愚常與公從事雅量有餘曾不知趙張之
蠶鬲豈鷹隼迅擊終不若鸞鳳之和鳴也我贊公像庶

幾典型道義視文章為重浮雲同富貴而輕至於生也
順事沒而吾寧疇為丹青可得而名也邪

雪堂普仁真贊

柳州序浩初讀書樂山水有文章父子咸為其道泊
焉而無求賢於惟印組為務以相軋者遠矣

道行貞純初不絕俗機鋒洒落即之可親苦空任沒膝
之雪處心探濟物之仁草坐容身雨花繽紛雷音淵默
獸伏鳥馴吐此圓神澹如凝雲耿金粟之孤影笑人間

之幾塵愛而贊之蓋浩初一流人也

中書左丞許公真贊

古人以道濟為任者時雖見於行藏心不間于微著於
皇先生道深絜矩以希聖為心律已為度上明君道之
方下易薄夫之慮危言立朝聞者悚懼公于斯時屹傾
波之砥柱非天下至誠其孰能與瞻拜公像魁然真輔
奉璋峩峩其儼而裕至於體用一源先後有叙試以中
元之治較之見論思與機務念公平生其丹青可得而

喻也耶

醫學教授趙公仲康真贊

洹水流潤太行唯我篤生異人司時之瘥顯允趙公被服委蛇道高而施博脈明而智多世以醫名者衆如公之醫中而不頗護養氣元玉池生波攻以峻劑我禁我呵鬱焉有餘揮之以戈俟其半衰濟之以和開壽域者五十年良聲番番其所以得于公者如是被之贊歌知陽報之有在福子孫而為那也

王子明傳贊

古人稱殺身易成事難雖然事有大小公私之間如不
有已私專以公心除天下之害此其成尤為難能而可
重唐代宗以萬乘之權羣公卿之謀至取一家奴宛轉
畏懦不敢明言竟以盜歸之而觀著之節可謂壯矣

刻栢夏禹像贊

并序

衡岳有怪栢一株世傳夏禹手植長沙溫將軍得斯
木一枝堅勁苾芬愛仰不已以為神明之物也刻帝

像以奉之亦臣子望舜九疑叫雲蒼梧之義也求潤色於余秋澗王叟稽首而為之贊曰

疊穆神禹玄功格天見之羨墻况手植之所刊帶不下而道存體雖微而儼然所謂斂之管窺浩浩淵淵嗚呼三代吾不得而見之得視斯像固足以揭吾之虔是將同啟石而不朽耶抑以與九疇而共傳也

田仲德先生畫贊

言論固樞機之先作行在士大夫為重卓越田公二者

錯綜氣無虛談才見寔用翺游侯伯之間擬擴香林之
供幅巾橫策掉首吟諷予嘗聞鄒蒙之辯說有以卜先
生之定動於戲文獻不足以柯為棟載瞻遺像安得不
有人物眇然之痛

栢溪主人張仲和真贊

堅以持其心直以養其浩用是二者以全純孝得其時
而濟斯媿安其貧而取進效其樂也融融為行也慍慍
氣溫而和貌儼以肖豈惟壽考兮康寧永以為鄉黨後

來之教

趙瓠瓜寫真贊

丹頰秀眉踈髯方頤目朗炯欲曙之星氣吐若垂天之
蜺畧施為而見底蘊攄懷卷而藏器機曩也為平津之
上客今而乃瓜田之布衣注酒滿瓠漑此鴟夷醢雞笑
甕天之舞醉袖拂西山之低趙趙躡嚅尚肯效夏畦之
病為浮雲富貴軒冕塗泥況斤鷄享鐘鼓之樂游談到
六印之累卧元龍之樓下覺許汜未全痴也

耄杖圖贊

先生姓馬氏名天昭字雲翰汾州介休人自號師易
老人丁丑歲壽八十有一

德維懿其存則不謂之命氣維克其定則能勝乎天故
衝風之火易熄溉旱之禾有年而況有道君子者焉矯
矯先生匪曲而全靜以仁樂健為德先應獵無夢絕羣
有編通而得夷惠之介默而契消長之權何軒冕之可
累豈山林而後賢氣精而鶴壽松貞而歲堅故得甲子

幾七七之數乾陽符九九之玄道與貌粹峙而停淵儼
乎若介山之鬱茂濟兮如素汾之淪漣方吾道之如線
賴此老之康延豈造物者畀西河南陽之壽固將為斯
文無窮之傳也耶

趙徵士畫贊

君名鉉字仲器多巧思精藝術今年六十有一自號
鈍軒逸皓所謂隱居求志行義達道者也祖質字景
道家大興之穴窺里金建春離宮在焉常有詩題學

舍壁間云折脚鐺中烹白薺打頭屋底看青山道陵
春水過見之為賞識左右以公姓名對召見殊加優
禮仲器公之曾孫也

蒼髯于思雙瞳炯然勁逸鬱幽燕之氣端倪探太易之
玄挫止其銳鈍而名軒曾於物而不滯浩冑中之一天
是謂建春徵士之後其青山秀句猶隱見於眉睫之間
也

故金滎陽令傅輔之畫像贊

其父霖延祐年間進士行部臨潢沒於王事

玉潔含光蘭幽藹芳孰為氣機貌溫而良我嘗陪公杖屨徜徉冲善為植德之本撝遜厚周身之防見之丹青衣冠堂堂維玉田之傳其故家文物尚髣髴明星之煌煌若子若孫既衍慶以襲吉又將見再世而昌也耶

韓御史畫像贊

晦其明而於物也周以旋介而通其於事也曲以全神湛秋水顏如渥丹藹藹蔚和愉之氣怡怡為孝友之賢

施之有政其達固然同我冠于豸府愛謬節之孤騫所
可見而知者如是其不可企而得者殆丹青之默然而
淵也

渡水十六羅漢贊

為聖安
容老賦

誰吮澹墨作佛事願頴含光開太始稽首尊者十六相
金沙灘頭渡淵水魚龍異獸同一家背負鱗浮供役使
碧蓮泛灩百花小兩脚何曾踏泥滓法身化現炯孤月
海風吹墮千江裏補陀巖竇寶香濃滄浪石上觀生死



白毫光滿海西岸航此洪濤悲一世玉溪老子出示余
意匠經營親說似禪機已落惓淡中我今試下第二義
九年面壁度龍象一日西歸攜隻履菩提樹下喜相逢
拍板高歌聊爾耳

香木琴贊

并序

南海石隱禪師合沉檀二木為琴絲而撫之其音克
諧有不讓於槁梧者段生得之以珍異丐余文以贊
之其辭曰

繫琴之胎以桐為材製自虞氏其來邈哉斲以香木南海之僧絲而理之有嶧陽之清物逐所好歸之伯寧脫燎爐之融液拉玉雷而為朋藹然雜芬菲之韻琅然泛韶濩之聲嗚呼琴乎學者寡而其將孰聽倘鍾期之與遇又何啻一再行也

劉巨川簋事真贊

砂如其文宙亦盛夫紐岑樓或龜趺累累多一皆殊彼斗大黃金塗懸肘後擊賊奴氣雖豪空淪胥三摩淨重

嗟吁猗叅相好古徒知澹癖為贈予何所誌遺

四子問孝圖贊

天地之經其維曰孝魯人所瞻巨室是效四子致問庶
幾要道因材為篤聖答各異發藥其偏從容和氣思煽
皇風永錫厥類怡聲粹色玉佩華裾表之丹青清風穆
如嗚呼安得一天下之慮宛同是圖

梁太師王彥章畫像贊

堂堂太師勇冠萬夫曾精甲之幾何破南城於一呼三

日奏捷數果不逾大廈將仆一木可扶衆且願望我誓
捐軀蒼髯模糊目光炬如戰酣歸來氣鬱犀渠惟孝與
忠同歸異途繫錦囊之三矢與長矛而不殊宜乎文忠
之筆大書特書不一書而已也吁

劉珍母王氏真贊

嗟嗟母氏恩斯勤斯自期寸章庶答春熙况復身後有
養何施履霜濡露感懷歲時嗟嗟母氏健幹而慈奉已
以約保家之肥致家之完乃有今日我食我衣皆母之

力暖暖停雲泉水湯湯我思母氏何日而忘

重華鼓琴圖贊

幽幽深山玄德聞兮二女釐降瀉水春兮乾健坤順其
道恒且久兮袵衣鼓琴固若我所有兮手揮五弦正始
此其時兮琅然玉音一氣為之熙兮鏘然和鳴鸞鳳以
之儀兮衣垂手拱其道本於斯兮升道蒼梧惋莫從兮
淚浥湘筠思何窮兮噫

故處士牛了齋真贊

眼高一世舌本懸泉噴噴珠璣孰為後先樂育自好以
全性天生也順受沒吾寧焉彼顏渥而丹野服脩然尚
知為鴈門儒將之裔庶幾青山白雲之仙也

故翰林應奉陶珉溪真贊

貌古而氣清言訥而行純此見於外者皆曰儒學之醇
若夫該貫經史筆幹千鈞玉佩瓊琚大玩斯文足以泛
珉溪之雪浪追顓軒之絕塵然綸恩甫沾而不祿壽靳
固於七旬天之報施果何有於善人哉弁朱衣正笏垂

紳雖未及直玉堂之署尚知為元貞辭翰之臣也

房星贊

粉色黯淡雙綵浮絳冠箕如枉劒緱陽環夜半海氣湧
火輪欲上鞭金虬赤腕躍入玄關幽殆侶戰勝褰雲攬
千金漢將非吾儔中令化筆通神謀冷風拂座寒颼颼

大德四年
臘八日作

房四星為明堂布政之宮亦四輔也下一星上將次
次將次次相上即上相所以理陰陽正教化南二星

君位北二星夫人位又為四表中間黃道之所從為
天衢又為天關南關曰陽環其南曰太陽北關曰陰
環其北曰太陰亦曰天廡亦曰天馬主車駕南星曰
左驂次左服次右驂又主開闔畜藏之所也

松化石贊

燕城趙彥
清家藏

伊石與松秉彛堅潤雲華根節鱗皴挺勁儼髯龍之淵
潛蛻康溪之深濬伊艮震之交感化而為他山之璫連
霧巖之玄豹隱錦斑而如振水木清華坤靈藉重氣變

無方靜含妙用物貴異稱金鏗玉振昔焉不封於秦今
也罔言於晉但摩挲而三嘆非張華而孰綜然室無滯
而不富况殊方之奇貢嚮為山人隱和之具今作仇池
怪石之供一線爐熏霽若雲翁栩栩蝶去夢繞神清之
洞

蛻齋劉先生真贊

先生諱思
齊燕人

猗歟蛻齋蛻肆螭蟠擴充家傳資深善誘愛波瀾之老
成宛黼黻之締繡曾管窺於一斑竟韞匱而莫售我瞻

遺像氣豐而部一官廣文祿才升斗挈簞瓢兮屢空曾
臧否之何有嗟共盡而奚言豈獨哀於吾友

蛻齋初與胡國瑞同年登第中統初為中書省掾後
辭歸為彰德路學官卒



秋澗集卷六十六



總校官進士臣胡榮

校對官學正臣卜維吉

謄錄監生臣劉本立

謄錄監生臣魏繩曾